

芥

舟

學

畫

編

芥舟學畫編卷三

吳興沈宗騫熙遠父述

傳神

傳神總論

畫法門類至多而傳神寫照由來最古蓋以能傳古聖先賢之神垂諸後世也不曰形曰貌而曰神者以天下之人形同者有之貌類者有之至於神則有不能相同者矣作者若但求之形

似則方員肥瘦即數十人之中且有相似者矣。烏得謂之傳神。今有一人焉。前肥而後瘦。前白而後蒼。前無鬚髥而後多鬚。乍見之或不能相識。即而視之必恍然曰。此即某也。蓋形雖變而神不變也。故形或小失。猶之可也。若神有少乖。則竟非其人矣。然所以為神之故。則又不離手形耳目口鼻。固是形之大要。至於骨格起伏高下。綢紋多寡。隱現一不謬。則形得而神自

來矣。其亦有骨格縐紋一一不課而神竟不來者。必其用筆有未盡處。用筆之法。須相其面上皮色。或寬或緊。或粗或細。或略帶微笑。若與人相接意態。然後商量當以何等筆意取之。則斷無不得其神者。夫神之所以相異。實有各不同之處。故用筆亦有各不同之法。或宜渲暈。或宜勾勒。或宜點剔。或宜皴擦。用之不違其法。自能百無一失。夫用筆之法。原不是故為造出。乃

其面上所各自具者。我不過因而貌之。直是當面放一幅天然名作之像。我則展而縮臨之也。有筆處的是少不得之筆。有墨處的是不可免之墨。有色處的是應得有之色。層層傳上。以待如其分而已。做到工夫純熟。自然心手妙合。形神逼肖矣。初學須多看古人名作。識其用筆之法。實從天然自具而來。細心體認。盡意揣摩。能識面上有天然筆法。自筆下有天然神理。若不

向此加工。徒規々於方員肥瘦長短老幼之間。縱或形獲少似。而神難盡得。傳神云乎哉。

取神

天有四時之氣。神亦如之。得春之氣者。為和而多含蓄。得夏之氣者。為旺而多暢遂。得秋之氣者。為清而多閑逸。得冬之氣者。為凝而多斂抑。若狂笑盛怒。哀傷憔悴之意。乃是天之酷暑嚴寒疾風苦雨之際。在天非其氣之正。在人亦非

其神之正矣。故傳神者當傳寫其神之正也。神出於形，不開則神不現。故作者必俟其喜意流溢之時，取之目於喜時，則梢紋挑起，口於喜時，則兩角向上，鼻於喜時，則其孔起而欲蔽口，鼻兩傍於喜時，則壽帶紋中間勾起，向頰。蓋兩顴之間，笑則起，愁則下，不起不下，在人不過無喜無愁。照此傳寫，猶恐其板滯而無流動之致，故必略帶微笑，乃佳爾。又人之神有專屬一處者，或

在眉目。或在蘭臺。或在口角。或在顴頰。有統屬一面者。或在皮色。如寬縈麻縐之類。是也。或在顏色。如黃白紅紫之類。是也。既能一一無差。復能筆墨清潤。無使重滯。而有輕和圓轉之趣。乃是妙手。其有一種面皮賸薄。肉色青黃。目定無神。口紋覆下。神氣短薄。意思懶淡者。縱有絕世名手。必不能呼之欲出也。竹垞老人謂沈爾調曰。觀人之神。如飛鳥之過目。其去愈速。其神愈全。

故當瞥見之時神乃全而真作者能以數筆勾出脫手而神活現是筆機與神理湊合自有一段天然之妙也若工夫未至純熟須待添湊而成縱得部位穎色一不甚相遠而有幾分相肖只是天趣未臻尚不得為傳神之妙也

約形

以盈尺之面而縮於方寸之中其睂目鼻口方位若失之毫釐何啻千里故曰約者束而取之

之謂以大縮小常患其寬而不緊故落筆時當刻之以寬泛為防先以極淡墨取目及眥次鼻次口次打圍俱粗之為之再約量其眉目相去幾何口鼻與眉目相去又幾何自頂及頷其寬窄脩廣一一斟酌而安排之安排既定復逐一細對過勿使有纖毫處不合即無纖毫處寬泛雖數筆粗葉其神理當已無不得矣夫面上邱壑高下無此子平地乃以貼平之帑素狀

之而能亦無此子平地非用筆有法如何可得
如不得法則無筆墨處皆必平。斯寬矣。今請
抉其不使寬而致平之故俾學者得所依據焉。
眼包睛而高如有細縐紋者則寫其縐紋以高
之如無縐紋者則於傍睛處略深其色以高之。
若眼眦深者須顯其勾筆若不深則不必故為
添設能四際安排得法亦必自然高起山根本
高即有塌者亦必略。高起故寫山根者須近

眉處下筆斜透至近頰處鼻尖兩筆有接著山根者直鼻也有不接山根者鼻梁中間開大也又山根有以一層者帶塌者是有兩層者其中層或上透眉心或下連鼻尖須略見筆法約定骨幹不得專以模糊之筆多次虛籠致成顚預模樣兩顴骨亦皆隆起其高處帶蒼色者先擦以淡墨後用色籠以高之或顯從眼梢下起一筆者或隱傍眼梢外上接眉稜下連頤輔者亦

當以淡墨勾取淺以色籠之。自覺隆隱起矣。眉稜骨無不起者。但隱顯之不同耳。隱者略施微暈。顯者須見筆痕。眉稜髮際之間。謂之天庭。天庭有重起而高者。則環勾兩淡筆於髮際之內。隱若圓起。有自下削上者。則傍眉稜以色暈入髮際。有凸起而堆前者。則當以色從耳根髮際兩邊暈籠。揔要使高下之形顯然可見。而仍不著形跡。為得口角壽帶。皆宜略為仰上。令得欣喜之

意。至於打圍。是寫其邊道側疊地面。故輕重出入濃淡之間。尤須用意斟酌。蓋一面之間。無一絲空處。即是無一絲平處。能使不空處皆不平。是謂緊合。不特癯而清者。必當如是。即腴而偉者。亦必如是。細較對。無一處不合。則不期神而神自來矣。故作他畫。或有宜於放筆而為之者。獨於傳神。雖刻刻收斂。尚慮有溢於本位者。若研習既久。經閱亦多。而絕無合作。大都不免因

平而寬之弊。有因是說而能致力於此。則他山之助。不無小補云。

用筆

兩間之物。無不可以狀之者。惟筆而已。夫以筆取物。而欲肖之。非用筆得法者。不能。況人之面貌。尤為靈氣發現之處。若徒藉凹凸蒼黃白晳紅潤之色。不過得之形似而已。其靈秀韶韻之致。萬不能得也。欲得靈秀韶韻之致。而不講

求於筆法之所在。亦萬、無由得也。試觀古人所作人物。但落、數筆勾勒。絕不施渲染。不但邱壑自顯。而且或以古雅。或以風韻。或以雄傑。或以雋永。神情意態之間。斷非尋常世人所易得。苟以庸俗之筆。仿而為之。則依然庸俗之狀而已矣。則甚矣用筆之足尚也。今之傳神家。全賴以脂赭之色。添而成之。縱得幾分相肖。必至俗氣薰人。難以嚮邇。即解以淡墨取凹凸為邱

壑亦慮神氣不清。惟無筆也。若能先相其人之
面。摘其應用筆處。以筆直取之。輕重恰合。濃淡
得宜。既不令其模糊。復不使其著迹。蓋不模糊。
則渾融之中。不沒清朗。神氣不著迹。則顯豁之
中。不失圓潤意思。於是清神奔。秀骨珊珊。雖
尋常形狀。一經其筆。無不風趣可喜。而仍能宛
以肖之。東坡所謂販夫販婦皆冰玉者也。實由
作者有不猶人之筆致。因而所作者亦各有不

猶又之意致。豈非用筆之妙哉。又面上皮縷及皺紋。皆應顯其筆跡。凡下筆必依其橫豎。如額之縷橫。故紋之粗細隱顯不齊。而搃皆橫覆至眉心。則縷又豎。纔過眉心。至山根。則其縷又橫。鼻山之旁。其縷又斜。自印堂插近鼻管。兩顴之縷。從眼稍魚尾紋分下。帶笑則長而深。否則略見而已。魚尾紋挑上。則環到眉稜。接著額之覆紋。兩顴之紋。皆依壽帶分垂。環向頰下。領下之

紋又橫項之兩旁則又豎寫紋當以勾筆取之
寫縷當以皴筆取之故知寫照惟用筆用筆之
道譬如蓋造房屋勾取大槩則如梁柱牆垣寫
及皴紋則如牕櫺堦砌雖未經丹雘之施已具
連雲之觀工夫大要全在用筆須將前代妙手
如曾氏一派細玩其下筆之道再於臨時能從
面部相取下筆的確道理勾勒皴擦用惟其宜
濃淡輕重施得其當無模糊著迹之弊有圓和

流潤之神則不僅獨步一時且將卓絕古今矣

用墨

傳神家不識用墨之道往往即以赭色布置部位不知面部雖有高下邱壑而其色實則一統或有幾處深色亦無關於凹凸者乃竟全以色添湊而成必至薰俗板滯縱得相似殊乏意致故必識用墨之道乃可以得傳神三昧即如作少年人及芳年女照其邱壑自有凹凸之處若

以赭取則太黃以脂取之則太赤苟非以墨取之何從憑藉即如面色蒼老兩顴及鼻尖眼眶俱粗皺而有深黝之色者皆當以淡墨擦過復以色和墨籠之層層而上必如其色乃心第不可使墨浮於色致有黑氣耳其法當以淡墨漬過然後再以淡墨籠之務要墨隨筆痕色依墨態成淺觀之非色非墨恰是面上神彩欲尋墨之所在而不可得不知皆墨之所成也又今人

於陰陽明晦之間太為著相於是就日光所映有光處為白背光處為黑遂有西洋法一派此則泥於用墨而非吾所以為用墨之道也夫傳神秘妙非有神奇不過能使墨耳用墨秘妙非有神奇不過能以墨隨筆且以助筆意之所不能到耳蓋筆者墨之帥也墨者筆之充也且筆非墨無以和墨非筆無以附墨以隨筆之一言可謂盡洩用墨之秘矣誠攻於此而有得焉未

有不以絕藝名於一世者

傅色

作照而能有筆有墨則其人之精神意氣已躍然於帛素之上雖未設色已自可觀但既有其色亦不可盡廢故傅色之道又當深究其理以備其法特不宜全恃丹鉛以眩俗觀耳蓋人得天地之中氣以生故其皮肉之色正黃惟內映之以血則黃也而間之以赤於是在非黃非赤

之間人皆以淡赭為之其色未免不鮮不如以
硃砂之極細而浮於面者代之為得人之顏色
由少及老隨時而易嬰孩之時肌嫩理細色澤
晶瑩當略現粉光少施墨暈要如花朵初放之
色盛年之際氣足血旺骨骼隆起當墨主內拓
色主外提要有光華發越之象若中年以後氣
就衰而欲歛色雖潤而帶蒼稜角相痕俱屬全顯
當墨以植骨色以融神要使肥澤者渾厚而不

磨稜瘦削者清峻而不巉刻若在老年則皮皺
血衰摺痕深嵌氣日衰而漸近蒼茫色黧腴而
少為顛顚甚或垢若凍梨或皴如枯木當全向
墨求以合其形屢用色漬以呈其色要極其斑
剥而不類於塵滓極其巉巖而自得其融和凡
此尚特言其大槩耳至於靈變之處非可概視
如人皆以凸處色宜淡而不知頭面之上其窠
出處動衝風日則色必深其窠處風日少到則

色必淺。如槩用其凹處。宜深之法。則諸突出處。必皆白矣。何以求肖耶。又人皆以婦人及少年之色。宜嫩白。嫩紅。而不知少年及婦人。亦有極蒼色者。中年以注。及老年之人。亦有極嫩色者。然少而色蒼。究是少年之神色。而不與老年類。老而色嫩。究是老年之氣色。而不與少年同。若槩以色之蒼嫩。配人之老少。又何能便相肖耶。又用色有死活之分。夫色之美者。莫如牡丹。又

莫如綵繒。然繒死而花活。試剪綵繒為牡丹。見者莫不賞其偏肖。若置於真牡丹之側。則必以彼為人為之偽。而覺此則自有天然之妙。如經徐黃妙腕。以筆蘸色點拂而成者。其偏反華潤之致。更足怡情。夫綵色非不艷。剪手非不工。而卒莫能及點拂以成者之能得其全神。蓋點拂而成者。雖無炫耀之綵。却有情態之流。此即所謂活色也。且花植物耳。其意致神情尚如此。况

人為動物之最靈者。欲形其形而并色其色。苟非參以活法。安能得其全神耶。故傳色之道。必外而研習於手法。內而領會於心神。一經其筆。便覺其人之精神丰采。若與人相接者。方是活色。夫活色者。神之得也。神得而形又何慮乎。

斷決

面部之位。其起伏連斷處。固無不圓渾。而用筆之道。又必於圓中存梗骨為得。凡諸起伏連斷。

之處皆欲以筆為主。以墨為輔。如落筆時不能決定其處。以下斷筆。勢必至狐疑無主。旋改旋易。迄無下筆之的處。即欲不磨稜而稜早已磨去矣。故於約定匡廓之後。將應落筆處。分作三等。第一等是極高起陷下之處。如鼻準。壽帶。輪廓。及眼眶。顴骨之淺者。以筆落定。以淡墨層輔之。第二等是略見凹凸之處。如眉稜。兩頤。山根。及眼眶。顴骨之淺而可見者。以淡墨落定。以

極淡墨略暈之第三等是本無凹凸而微見高低之處如額上圓痕眉間豎筆兩腮有若隱若現之紋雙頰露似有似無之跡則亦以極淡之筆落定其處而略暈之凡諸落定之處務要斟酌的當勿使出入其或宜側或宜正或宜輕或宜重者則皆歸力於墨而墨又不得因有筆可倚而故多填湊以致烟薰滿面所謂筆者猶行文家立定主見如鐵案之不可移易所謂墨者

猶行文家輔以辭藻。但當暢遂其意。不應故飾浮華。以妨大體。今因論斷決之筆。而復及輔佐之墨。蓋以用墨之道。其多寡出入。亦有分量。不得以為輔佐而可不論也。

分別

天下至不相同者。莫如人之面。不特老少蒼嫩。各人、殊。即一人之面。一時之間。且有喜怒動靜之異。況人各一神。烏可繫以一法。今請申諸所

以分別之故有部位之不同者長短濶狹是也
有邱壑之不同者高下淺深是也有顏色之不
同者蒼黃紅白是也有肌皮之不同者寬緊粗
細是也人之面貌其豐歉盈縮長短濶狹之數
若有一定故豐於面者必歉於側盈於側者必
縮其面長者必狹其側短者常濶其面推而準
之男女皆然至於三停五眼之數亦無或異三
停者自頂至眉為一停自眉至鼻為一停自鼻

至頰為一停。若就其俯者而觀，則上故豐而下故歉。就其仰者而觀，則上故縮而下故盈。五眼者，人兩耳中間有五眼地位。惟濶面側處少，故常若有餘。狹面側處多，故常若不足。作者於耳根及顴骨交接處留心，便得之矣。將為人作照，先觀其面盤，當以何字例之。頂銳而下寬者，由字形也。頂寬而下窄者，申字形也。方而上下相同者，田字形也。中間寬而上下皆窄者，申字形。

也。上平而下寬者，用字形也。下方而上銳者，白字形也。上下皆方而狹長者，目字形也。上下皆方而匾濶者，四字形也。其上下平準，不在八字之例者，須看得確有定見，然後下淡筆約之，復再三斟酌以審定其長短濶狹，使無纖毫出入，斯無不肖矣。面上邱壑，難以言擬，今略舉其大槩，以俟學者例求。其五岳高起者，固當尋其用筆之處，其顯然應用勾筆者，斷須見筆，若平塌

者雖不必顯然見筆亦宜隱約其間至於落墨當以墨之濃淡分作十分量用如眼覆筆及圈瞳點睛是十分墨則眼上下重紋及老年眼眵壽帶口痕鼻孔是七八分中年以後壽帶及眼眵深者應七八分淺者或五六分最淺者或三四分山根及兩頤應四五分或二三分顴骨及眉稜應二三分或一二分漸々添起時省察莫令過分務使凹凸隱顯無毫釐之失此高下淺

深之不同也。人之頰色。自嬰孩以至垂老。其隨時而變者。固不可以悉數。即人各自具者。亦不可以數計。今試論其大槩。所謂蒼者。乃是氣色。最老之意。不論紅白皆有之。此色非脂赭所能擬。要於未上粉色時。先將淡墨拌其重處。若皮有細皺。則當以淡筆依其肉縷。細細皴好。大約一面之最蒼處。在天庭鼻準兩顴。蓋風日所觸。必先到數處。故蒼色獨甚耳。既上粉色。淺或應黃。

或應赤再以色籠之。如墨不足亦可補上也。所謂黃者。即蒼色之未甚者。故其所著之處。皆與蒼同。若歷年數久。便是蒼色也。在用墨時。不必預為計慮。上粉色後。以淡赭水漸々漬上。不可一次便足。致不潤澤。且人之面色。本如淺色花瓣。無有一處勻者。畫者借此以著筆墨。即藉此以成氣韻。粗心看去。不過統是一色。細意求之。則此重而彼輕。此淺而彼深。能一一無差。自然神情。

逼肖矣。所謂紅者，乃是人之血色也。而血有衰
旺之分。於是面色有榮瘁之別。當於黃色既成
之後，觀其幾處是血色。數現以臙脂破極淡水，
漸次漬之，便覺氣色融洽。又有一種通面紅潤
之色，當於上粉色淺，先通以淡紅水敷之，復於
赭色內添少脂水，加其應重處，亦分作數層上
之，乃得白者。人之肉色也。肉色本白如玉，血紅
而皮黃三者和而成是色。若是靜藏之人，不經

風日自能白皙光瑩更須有一段光潤之色方為有生氣上色時須粉薄而膠清粉薄則色不滯膠輕能令粉色有玉地今人不解其理不論老少早上一層厚粉一片平白雖有好筆已經抹煞於是粉上加色無非痕跡且是死色夫色既死矣安望神之活動哉此則蒼黃紅白之不同者也面上肌理自少及老既隨時而易而生而自具者又各不同肌膚寬者若皮餘于肉骨格

亦猶夫人而處：寬泛遇有摺致必深而長作者當於落墨時筆、見法不可磨稜蓋膚理寬者非必肥胖或前肥而後瘦者若一磨稜便不是寬之神理矣有肌理緊者若皮不能包裹骨肉而處：有牽強之意雖無深紋長摺亦大有起落高下且此種相必帶青黃之色而常若病容者神情短薄最難摹寫作法當以極淡墨不論遍數層：潤起令極牽強中少得自在意思

極澀滯中。略有流動之趣。始稱斡旋造化之手也。有肌理粗者。或巖嵌如柑皮。或麤厲如樹縷。且皺且麻。點子與皺紋相雜。非黃非黑。斑痕與赤色相兼。既雜亂而無章。復斑斕而無定。然屬文雅之流。就中却饒風趣。苟不細心體會。必至塗抹而成。不但失其神。且失其形矣。作者須於應皴處。應勾處。應點處。應暈處。及應濃處。應淡處。應黃應赤之處。一一還清。則粗濁者其形耳。而清雅

流利之神。自流於筆墨之間矣。有肌理細膩者。或光潤如玉。或鮮艷如花。而邱壑高下。亦復朗然如列。作者幾歎無從下筆。不知面之極細嫩者。全賴用墨得法。誠能以淡々筆墨。尋其下筆之處。若隱若現。漸次寫起。邱壑凹凸。已無絲毫之失。乃傳以輕膠薄粉。覺墨痕在隱約間。然後於粉上用脂赭層々輕籠。令部位高々下々。非墨非色。而晶瑩潤澤。彌覺可愛。形無纖微之失。

則神當自來矣。此寬疎粗細之不同者也。以上
四條分十六目。其用筆墨及脂赭之法已具於
此。而所以不同之故。仍俟學者能盡力以究成
規。虛心以參活法。求作者臨前自有種々法度。
熟極巧生。不過無方之應。文成法立。乃為有本
之源。到此時候。下筆如印。如鏡。一涉其手。覺世
無難寫之面矣。

相勢

傳寫之道元不必拘於一格不解道理者但知當面描摹豈知畫雖一面而兩旁側疊之處實有地面何可略去則是動筆便有三面方得神理具足若五嶽皆高起者但竭力以圖正面不過略得其意而高起之處斷難取須帶幾分側相乃能醒露蓋寫人正面最難下筆若帶側則山根一筆已易著手而上下諸相照應處俱有一氣聯絡之勢用筆既得聯絡而墨以輔之

安慮神情之不活現哉。欲作側相。須用心細相部位。全見之半面。覺寬而空。却要處。緊湊。使空處都有著落。偏見之半面。覺緊而窄。却要處。處安舒。使窄處俱有地面。初下筆時。要定作幾分側意。直到匡廓完全。不得少有猶豫。匡廓已定。漸々添起。總要依傍。初定數筆。墨痕無使差失。便稱得訣。寫側面者。以鼻梁一筆為主。此筆能寫鼻之高下。及側之多少。最為要緊。次則就

側面寫顴骨一筆。此筆若在正面。即百什筆所不能取者。乃可以一筆取之。次則天庭一筆。取額之圓正凸削。又次則地閣一筆。取頰之方圓出入。又將耳根一筆。細細對定。落準其頤頷相接之處。此皆寫正面者。不知其幾費經營而得者。此則俱可成於一筆也。部位匡廓已定。餘不過摺紋深淺。顏色蒼嫩。無難事矣。又有凸額凹面。及鼻梁分外高起。下頰分外超出者。若不帶

側必難相肖。或數人合置一圖。當必各相照應。尤須以側為勢。先相其數人中。若者宜正。若者宜側。既易於取神。復各有顧盼。是借其勢。以貫串通幅。神氣何便如之。故欲能相勢。必先工於側面。而後隨其勢而用之。亦安注而不得哉。

活法

傳神固在求肖。然但能相肖。而筆墨鈍滯。作法膠固。烏得即為妙手耶。且同是耳目口鼻。碌

之夫未嘗無好相而與之相習漸覺尋常雄才
偉器雖生無異質而一段英傑不凡之槩時流
溢於眉睫之間觀杜少陵贈曹將軍詩可見矣
今人但知死法不求變化之妙依樣寫去祇是
平庸氣息耳夫以平庸之筆寫平庸之人猶之
可也若以平庸之筆寫非常之人如何可耐方
將以不平庸之筆寫平庸之人俾少減其平庸
之氣奈何以平庸之筆寫不平庸之人哉且天

地之間惟人也得其秀而最靈而造化之妙又惟筆能參之今以筆寫人是以靈致靈而徒憑死法既負人且負筆矣愈知寫照者不可但求之形似也然所謂活法者又未嘗不求甚肖惟參以靈變之機則形固肖而神更既肖且靈之為貴也今有非常之人儕於庸衆識者必能物色以其氣象之不可掩也而此不可掩之氣象惟筆可傳耳其傳之也或一時而得或經

而得或得其態於無人之際或得其神於酬酢
之交或因平直而得之或藉巧變而得之筆到
機随心閑手暢脫穎而出恰如乍見之神迎及
以披適值無心之合熟極之候動不踰矩會意
所成多不如少出之也易既無張皇補綴之痕
得之也全有活脫圓融之妙此所謂一時之得
蓋出於偶然者也揣摩有日貫想多方刻勵以
求既徹終而徹始鑽研而得亦見淺而見深往復

尋求功深效見。爬羅抉剔。苦盡甘來。人十已千。
魯者獨能傳道。先難後獲。成時方信功夫。此所
謂經久之得。蓋出於功力。而非質之所能限也。
心與天遊。尚未形其喜怒哀樂。神歸自在。更不
關乎動作語言。若動若靜之間。非肆非莊之際。
澄泓無滓。如秋水之在寒潭。磊落多姿。若奇峰
之凌霄漢。和而泰。覺道氣之冲然。安以舒。乃天
機之適爾。此所謂能得其無人之態者也。非筆

格絕高曷以臻此眼稍旖旎喜意流溢於雙眉
口輔圓融樂事顯呈於兩頰疑真而并忘疑假
接之如生載笑而愔聽載言呼之欲應想寤歌
之神味儼對客之形容顧盼有情素識者固如
逢其故歡欣無限素昧者亦悅覩其人此所謂
能得酬酢之神者也筆墨之輕圓靈活蓋獨絕
矣眉清目秀鼻直口方條理井然無事深求巧
法神情朗暢但須不失常規看骨相之清竒法

以顯而愈妙。覩儀容之周正。形隨筆以成圖。援
筆立成。更見丰神大雅。披圖宛在。翻疑擘畫徒
勞。此則以平直之法而得之者也。是在輕重隱
現之間。但以勾勒取之足矣。或貌寢而格奇。或
神清而骨濁。求其貌而失其格。幾相似而實非。
寫其骨而違其神。雖已近而終遠。是非巧思難
致。神全一成之法。無所施。百變之機。庶可濟。法
外求法。乃為用法之神。變中更變。方是求變之

道此則所謂藉巧變以得之者也。今之寫照者，令人正襟危坐，刻意摹擬，或竟日不成，或屢易不就，不但作者神消氣沮，即坐者亦鮮不情怠意闌，縱得幾分相似，不失之板滯，即流於堆垛。騷人雅士見之，定當攢眉，亦何取於筆墨哉？吾所謂活法者，正以天下之人無一定之神情，是以吾取之道亦無一定之法。則學者參此而有得焉，方知嚮之著相以求者，皆非有用功夫矣。然人亦

安能起手便知活法哉。但於既熟規矩之後時
頃叅此以希靈變而後可幾於阿堵傳神之妙。

芥舟學畫編卷四

吳興沈宗騫熙遠甫述

人物瑣論

六書之象形已肇畫端山龍作繪固象旁求由
未尚矣于是踵事增華凡作人物必有所以位
置者則楹石屋宇舟車一切器用之屬無不畢
採以供繪事然必欲其神合而不徒以形取也
學者當先求之筆墨之道而渲滌點綴之事後

焉其取初而最要者在乎以筆勾取其形能使
筆下曲折周到輕重合宜無纖毫之失則形得
而神亦在箇中矣又筆不可庸腐纖巧不庸腐
可幾於古不纖巧可近於雅不共古雅其於畫
也思過半矣間有出入亦其人之資力厚薄淺
深所致而要各有所取也今者去古云遙庖頭探
微之蹟不可得見矣所偶見者宋元以來遺跡
的有一脉相傳道理學者當於非道者雖精巧

炫目。悉宜屏絕。是道者。雖草率見意。亦細推求。久之而有得焉。斯絕業于焉克紹矣。何必親登。顧陸之堂。面領曹吳之訓。而後可以名世也哉。

學作人物。最忌早欲調脂抹粉。蓋畫以骨幹為主。骨幹只須以筆墨寫出。筆墨有神。則未設色之前。天然有一種應得之色。隱現於衣裳環珮之間。因而附之。自然淺淺得宜。神采煥發。若入手便講設色。勢必分心於塗抹。以務炫耀。不識

畫理者見其五采鮮麗便已侈口交稱任意索取遂令酬應馳騁之心不可自止於是驅遣神思無非務外而鞭迫向裏之功日已疎矣久之而自顧無奇漸成退悔亦已晚矣豈不可惜蓋初學時天資縱好而識見未能卓定且速成之心人所不免因此隳廢者什恒有九故先論及以為首懲

初學作人物若全倚影摹舊本習以為常將終

身不得其道。法當先將古人善本。細細玩味。如頭面部位。須分三停五眼。周身骨骼。要從衣外看出。何處是肩。何處是肘。何處是腰。是膝。正立見腹側立見背。及腰衣有寬緊長短之別。勢有文武動靜之異。而骨骼部位。總無二致。作衣紋時。須知此一筆是寫其肩。則一身之正側俯仰。及兩手之或上或下。皆於此定。肩既定矣。次及於手。後及袖口。袖口之上。要知下此一筆。是寫其

臂灣。又一筆是寫其肋。則自肩及手之筋絡。亦於此定。次及其腹。則體之肥瘦。勢之偏正。定焉。後及其兩足。或屈或伸。或開或並。先從腰下落一筆。再接下一筆。是寫其膝。其坐者。其立而俯者。膝當隆起。若仰而立者。不必見膝也。凡此皆骨節之隱於衣中。而於作衣紋時。隨筆寫出者。此但言其一定之理。至於衣紋筆法。須從舊本求之。能因吾說而尋繹焉。則頭一是道矣。又一說。

凡初學者先將裸體骨骼約定後施衣服亦是起手一法。但幾處最要勾勒之筆仍不外上所言耳。

既知安頓部位骨骼務須留心落墨用筆之道。夫行住坐立向背顧盼皆有自然之態當以筆直取若絕不費力而能無不中綮者乃為得之矣。今者正法無傳邪說雜起或故作曲屈或妄加頓挫或忽然粗細或猛如跳躍是皆庸俗之

手無以見長。但借此數端以駭俗目。昧者從而和之。至等於沿門獨黑而不自知。故留心斯道者。當初學時。先須屏棄數種惡習。徧覓前古正法。遠則道子龍眠。近則六如十洲。類而推之。有不大遠。此數家者。不論已經臨摹之本。及石墨刻皆可取。以為楷式揣摩。久之筆下自然古雅典則。而有恬澹冲和之氣。以之圖寫聖賢仙佛。及高隱通達之流。庶幾彷彿其什一。若筆墨惡

俗不但不能得其萬一且污蟻實甚何可列于
尊彝典冊之間耶自仇唐以來正法絕響而楊
芝呂學碩源董旭及閩中黃慎輩先後攪擾百
年間人心目若與俱化同此者取異此者棄間有
資性敏而功力深者以識之未定遂至沉溺其
間趙松雪謂甜邪俗癩為四惡苟其無害于人
君子惡之必不若是其甚也今則又非松雪之時
矣百年不為不久天下不為不廣顧瞻其間誰

為紹仇唐之後者。吾故不得不歸咎於稂莠之太多。以致嘉禾之難植也。

古所傳名蹟人物。其妙者。多出於瀟灑流利。而不在於精整密緻。蓋精整密緻者。人為之規矩。瀟灑流利者。天然之變化也。但初學者。起手便欲瀟灑。勢必至散漫而無拘束。於是進取難幾。終歸無得。學者先當取極工整者。以為揣摩之本。一句一拂。務窮其故。深識當時運思落筆之

意久、為之必自有生發意思。再以較量折算之法時、照顧如古所謂丈山尺樹、寸馬豆人。一、無差是則所謂能盡手規矩者也。日漸純熟、能至不浚求而自合、不刻意而無違規矩在手。法度因心、任我意以為之、無不合古人氣局。乃瀟灑流利之致、溢于楮素之間矣。今之學者、槩有二病。皆關資稟。天資駑下者、狃於規矩、死守成法。起手工夫、非不好。而拘攣拙鈍之弊已

成雖好學不倦難幾古人地位天資高朗者心
期縱逸忽易卑近涉心便解不耐深求而脫畧
率滑之弊遂至害事且前此築基之功未足以
致心高手澀反因湊拍不來漸々退落何暇問
與古人合不合哉然愚則以為二者未始不皆
可成就也駑下者稍識規矩日加開拓一見妙
蹟刻意以求其合更得明師益友日為補助讀
書明理以通天地氣機之化自得漸々靈動日

復有悟而求進不已。不難心神朗徹。所謂以魯而得之者也。高朗者。耐心煩瑣。俯就規矩。莫忽近以圖遠。毋遺小以務大。歛之束之。以防其氣之矜。沉之凝之。以固其心之軌。時々望古人之難到時。覺已習之難除。功夫日進。而無敢少自滿足。自然內力日深。而菁華卒不可遏。其瀟灑流利之致。更非駕下所成者可及矣。嗚呼。中行之質。有幾人哉。有志者。誠能先識資稟之何

如而進退出入之各得其宜焉其所成就總有可觀信今傳後何至獨讓古人

凡圖中安頓布置一切之物固是人物家所不可以須要識筆、相生物、相需道理何為筆筆相生如畫人因眉目之定所向而五官之部位生之因頭面之定所向而肢體之坐立生之作衣紋亦須因緊要處先落一筆而聯絡襯貼之筆生之及其布景如作樹須因榦而生枝因枝

而生葉作石。須因匡廓而生間破之筆。因間破而生皴擦之筆。以及竹木掩映。苔草點綴。無不有一氣相生之勢。為之既熟。則流利活潑之機。自能隨筆而出矣。何為物々相需。如作密樹。需雲氣以形其蓊鬱。作閒雲。須雜木以形其蹇蹏。是雲與樹之相需也。屋宇多橫筆。掩之者須透直之長林。樹枝多直筆。間之者須橫斜之坡石。是橫與直之相需也。至於烘托之妙。則有處與

無處相需而烟靄之致以明交接之間此物與
彼物相需而穿插之處乃顯繁亂者濃淡相需而
條理得以井然蕭疎者遠近相需而境界得以曠
闊其或命題之不可缺者雖不常作之物當一
一還他但要位置得宜而不傷大雅或露其要
處而隱其全或借以點明而藏其跡如寫帘于
林端則知其有酒家作僧於路口則識其有禪
舍要令一幅之中無非是相生相需之道加以

剪裁合度添補得宜令玩者遠者近者皆無不稱乃得之矣

凡人物家布置景色但當作一開一合蓋所謂小景原不過於山水大局中剪其一段而自為局法若以一二工緻小人物而真之羣山萬壑之中稍大人物補之重崗複嶺之下則皆不合法此二者論之於理未嘗有乖繩之以法則大有碍作者但就法一邊論可也揔之人物多則景

物可多。人物少。則景物斷不可拍塞。蓋局法第一。當論疎密。人物小而多者。則可配以密林深樹。高山大嶺。若大而少者。則老樹一幹。危石一區。已足當其空矣。以此推之。則疎密之道。自了了矣。

作人物布景成局。全藉有疎有密。疎者要安頓有致。雖略施樹石。有清虛瀟灑之意。而不嫌空鬆。少綴花草。有雅靜幽閑之趣。而不為岑寂。一邱

一壑一几一榻全是性靈所寄。今見者動高懷興遠想。是謂少許勝人多許。如倪迂老遠岫疎林無多筆墨而滿紙逸氣者。乃可論布局之疎密者。須要層々掩映。縱極重陰疊翠。略無空處。而清趣自存。極往來曲折。不可臆計。而條理愈顯。若雜亂滿紙。何異亂草堆柴哉。凡畫當作三層。如外一層是橫。中一層必當多豎。內一層又當用橫。外一層用樹林。中一層則用欄楯房屋之

屬內一層又當略作遠景樹石以分別之或以
花竹間樹石或以夾葉間點葉。總要分別顯然。
夫畫雖有數層而紙素受筆之地只是一層是
在細心體會。其外層受筆之外便是中層地面。
中層受筆之外又是內層地面。惟能調劑得宜。
不模糊不堆垛不失章法。便可使玩者幾欲躍
入其中矣。一局之間又當作股數多不過三四
一股濃重餘股當量其遠近而少疎淡若通體

拍塞者能以一二處小空或雲或水俱是畫家
通靈氣之處也有全露之叢林無全露之屋宇
有成片之水面無成片之平地路必求通泉必
求源畫近處要濃重遠處要輕淡固是成說然
又不當故以輕重為遠近要識遠近之法在位
置不在濃淡攢而能離合而能別葱翠盈前無
非氣韻菁華滿目盡是文章乍見足駭人目細
玩更怡人情密而至此吾何閒然

畫人物輔佐首須樹石而次則畧畫花草之屬又其次也但同在一圖必當相稱若輔佐不佳亦足為人物之累見有人物亦工整設色亦有法即畧畫折算亦能無差而一涉樹石便現出幾許扭捏而不可耐蓋憑葉本而為之者也夫至樹石雖有葉本而無平日功夫者一筆難措即勉強為之不足當識者之一笑故知作畫者諸可強而樹石實不可強也且樹石全在筆法有

筆法則信手寫去皆成氣象如筆法未合縱有
曹吳善本李趙妙蹟何可供我摹搨耶即如楸
法種類不一須曲直偃仰之合宜位置多方要
掩映穿插之有致橫枝秀出直幹凌霄則其筆
宜挺而爽老影婆娑虬枝屈曲則其筆宜折而
蒼細柳新蒲不失飄揚之度蒼松翠柏具有斑
剥之觀春樹拂和風老幹與新枝相映秋林披
玉露丹楓與翠竹交輝菽日沉一片綠雲蔥

鬱凝空飈。幾枝瘦影蕭疎。老樹壓低簷。論
其年幾忘甲子。蒼崖橫落澗。擬其狀不啻龍蛇。
高呈骨相之奇。葉以風霜而盡脫。遠作迷離之
態。色以烟雨而如昏。梅須瘦而清。相對者詩人。
詞客。竹欲疎而韻。宜稱者逸士佳人。凡此形容。
皆筆墨所出。而各得其神。則作樹之道。其庶幾
矣。至于石法。既無一定之形。復非一家之筆。或
宜峭而嶮。有森然欲搏之奇。或當秀而靈。著莫

測神工之巧可凭似案供坐卧於園林彼列如
屏待留題於騷雅映琅玕之憂玉閒直者皴必
多平伴拏攬之撐空配奇者筆尤須橫遠而望
之既層疊而又峻嶒近而察之已皺瘦還兼漏
透蒼苔碧蘚疑蹲獅卧虎之驚人竹映花遮儼
翳袖飄裾之可意臨水濱而特立如招問字之
船當細徑以橫施故曲登山之屐至若湖山佳
麗礧磴奇觀觀飛瀑於懸崖巉稜峻削映清流

於淺瀨高下衆差石之靈者出自天成惟筆墨
乃可奪之可知筆墨之巧亦有出而不窮之妙
在作者胸中之所蘊而作者之所蘊又在於平
日見聞之廣學力之深臨時揮灑隨觸隨發一
圖屢作各不相襲則能事畢矣故欲作人物者
必當先究心楮石而漸及其他也

今之論界畫者但用尺引筆而于折算斜整會
意處能一一無差便稱能手不知此特匠心所

運施之極工細者乃稱若大幅人物不得用尺用尺即是死筆也凡作屋宇器具筆湏平直當先以朽筆用尺約定以豪筆飽墨運肘而畫之如今之書鐵線篆者便合古人作法則雖是極板之物仍不失用筆之道是以可貴若以尺引筆豈復是畫哉耶恕先仙山樓閣圖稱古今界畫之極若是用尺則與印本中所作臺榭何異哉又凡應用界畫之物必須款式古雅斷不可照

今時所尚刻意求精巧。且林木縱橫。山石磊落。之間忽作一段整齊之筆。亦是散整相間之道也。要知處々從筆端寫出者。即處々從心坎流出。如作人物。必于衣紋見筆法。作樹石。必於勾皴見筆法。獨於橫直之紋。乃可不用筆法而為之耶。聞年雙峰有客。無他能。但能以素紙上運肘畫碁局。不爽銖黍。雙峰固賞鑒家。以其能得畫中界畫道理耳。凡子弟於十餘歲時。日令其

作徑尺圓圈及橫堅長畫後來作書畫得許多便宜

一幅中人物樹石近者宜大遠者宜小畫理固然
令人注目于近處形體大而筆痕粗重於遠處
形體小而筆痕亦隨而輕細近處遠處竟似大
小兩副筆墨豈理也哉夫畫以筆墨為重起手
數筆意思已定通幅不得少雜近處人物樹石
理當大而筆痕不應故粗而意則同於遠處遠

處理宜小。但當少其筆數。亦同於近處。是畫理之大要。於此未深者。但解求諸形似。何暇究心畫理。以致功日多。而理日昧。勞精弊神。無非悖乎畫理。吾甚惜之。因願有志者。能於筆墨間求道理。不甚遠矣。

人物家固要物。求肖。但當直取其意。一筆便了。古人有九朽一罷之論。九朽者。不厭多改。一罷者。一筆便了。作畫無異於作書。知作書之不

得添湊而成者。便可知所以作畫矣。且九朽一
罷之旨。即是意在筆先之道。張素於壁。凝情定
志。人物顧盼。邱壑高下。皆要有聯絡意思。若交
接之處。少不分明。曉再細推敲。能使人一望而知者。
乃定意思既定。然後灑然落墨。兔起鶻落。氣運
筆隨機趣。所行觸物賦象。即有此小偶誤。不足
為病。若意思未得。但逐處填湊。縱極工穩。不是
作家。每見古人所作。細按其尺寸交搭處。不無

小誤而一毫無損於大體。可知意思筆墨已得。餘便易之矣。亦有院體葉本。竟能無纖毫小病。而賞鑒家反不甚重。更知論畫者。首須大體。作畫氣體。渾璞為貴。明秀次之。更能不失卷軸風流。乃成士夫家筆墨。夫渾璞明秀。於山水則在筆墨之外。於人物則在筆墨之中。蓋山水是籠罩出來者。人物是發揮出來者。故人物之難當。倍於山水也。嘗見騷人逸士。未嘗究心六法。

偶見人作山水便效為之或竟有可觀者從未
有不學而能作人物者也學作人物者用數載
工力已能成立藁本矣必博求古人所作如不得
原蹟即木刻石刻規模亦在取以參看而得其
先後之所以同揆遇有合轍者雖素未著名亦
當取以欣助如其非道縱藉甚聲稱名高一世
亦所屏絕如是以進則志趣日益高筆意日益
古先於明秀後期渾璞功夫極處則明秀處不

失渾璞而渾璞之中其明秀又所不必言矣。
布置景物及用筆意思皆當合題中氣象如譙
會則有忻悅意思離別則有愁慘意思寓聖賢
仙佛令瞻者動肅穆之誠寫忠孝仁慈令對者
發性情之感山林肥遯瀟灑而幽閑鐘鼎賢
豪瀟雅麗而典則副閨房之美女雖奇石高枝
亦呈媚媚稱恬退之幽人縱散樗亂石亦具清
靈方外清流但覺烟霞徧體才華文士可知廊

廟雄姿農圃呈時世之昇平。渙樵識湖山之故
浪飛仙本不可見。宜悅惚而飄揚。鬼物原無所
憑。宜竒變而詭譎。以及綺園歌舞。極穠華美
麗之觀。獵騎飛騰。窮罄控縱送之態。靡不各盡
其致。道子龍眠卓越千古。亦不外是也。

布景大局已定。而中間隨宜點綴古玩及花草
之屬。亦人物家之不可少者。須位置得所。方稱
古玩或磁或銅。款式宜古雅而不宜多。則類

於骨董肆而反傷雅道。平日所見佳製古器圖
其數種酌而用之可也。至於閒花小草補綴於
樹根石隙以助清幽閒適之趣宜以筆蘸色隨
手點染雖工緻人物亦不宜用勾勒蓋以筆筆
點出具有生動之致若勾勒所成便傷於刻且
失之板實反害大體矣。但巖壑之姿玉堂之彥
閨房之玩籬落之風其所點綴則又自有分別
存乎其間矣。

點勒苔草最關全局氣韻非可漫為增損所謂
苔者施於石之巖嵌巔頂及榭之老幹與糾結
之處藉以明顯界限而蒼然之致以出故一處
不過數點宜用焦墨若重設色以青綠嵌之其
依理而密點者乃草耳不得與苔相混若地坡
細草則或點或勒借以破地坡之平行而映出
人物衣紋更使明白且氣韻萋迷尤可助通幅
之神但疎密濃淡多寡之數須臨時斟酌非落

墨布局時所能預定也。夫若能明顯界限固已而草之為用又能聯絡氣脉。蓋布景用筆不過橫豎其境界地面不過平直。凡豎而直者易於圖寫。至平而橫者難以妥帖。而安頓諸色物件又多在平處。而平處又不可多見。若通幅數見平地最取人厭。故當隨處有平地但隱而不見又曲折可通。足令觀者色舞。且林木縱橫峰巒層疊之餘。忽留一片平陽。芊綿艸色。騷人逸士。

藉以為茵。移時晤對。亦愉快之絕境也。點苔是通局之眉目。寫草是通局之鬚髮。鬚髮眉目之間。已自炯然。則不待徧見其五官百骸。而識其非凡品矣。

筆墨絹素瑣論

作畫者。辟諸戰陣。筆為戈矛。墨為芻糧。絹素則地利也。主帥與士卒俱已上下一心。使如臂指。更兼此數者相助。自當所向無前矣。筆之所助。能

使曲折如意剛柔合宜而飛動軒爽之氣沉着
痛快之神皆於是手得之墨之所助能使淹潤
如濕秀結如金而霏微烟靄之致幽深杳渺之
觀亦於是手得之至於綃素則承載筆墨發揮
意思當前則腴潤而可玩向後則壽世於無窮
且興會所至機趣所發必有以引而出之者苟
相助之不得尤足隳人意氣作者不可以其無
關緊要而忽諸也

今之作人物者大都皆用狼豪蟹爪雖巨障長幅亦以此為之不知筆身細必多貯水則不能緊斂而腕力何由得著遂無爽颯意思矣如作二三寸人物而極細緻者則用蟹爪筆落墨稍大者則筆亦如之純羊豪兔豪兩種不可用他豪兼成者皆可但量其大小酌其剛柔用之既服不必更易他種矣

藏墨家俱貴古製若書畫家所用則新而高者

足矣。蓋書畫皆取色澤。而畫為尤重。若墨舊膠
退色。反晦黯。何取哉。今新安佳製。儘堪供用。施
之金箋。而光澤肥艷者。已是極好之品。和以金
屑。而故高其價。非所尚也。

紙之流傳者。愈古則愈佳。唐以上不可知矣。就
金粟藏經紙一種而論。越今已幾千載。不過其
色稍改。而完好緊韌。幾不可碎。以此作畫。雖傳
之數千年。無難也。今則盈尺數金。安得供我揮

灑下而宋元諸箋雖不如藏經猶堪經久亦何
可多得惟前明宣德間最精研於造紙而得留
於今者時或可遇亦難多得近時造紙涇縣最
盛而宣城所造貢紙細膩光結已屬今時極品
但柔順有餘而剛健不足作書畫者生於今必
得如前古紙素則將擱筆已乎余年來無他好
惟展紙弄墨消磨時日安得如許佳紙即人所
持來者亦尋常坊間物耳向嘗偶閱米海嶽帖

有論漿塤紙者。乃繹其意。選汪縣諸色紙中之
最好者。以白芨泡出漿水。拭過。槌之。使光結。可
玩。且宜筆墨。則以供常用。如偶遇宋元諸箋。及
宣德所製者。便是此腕難得之遭逢矣。作畫家
宜痛絕鑿紙。鑿紙作畫。筆意澀滯。墨色浮薄。且
不百年而碎裂。無寸完。余蓄夏太常墨竹。是散
金鑿紙本。筆墨尚好。而紙本遍體破碎。不可裝
潢。惜哉。

前人作畫多用絹而絹亦麤細不一非惡麤而貴細也工緻宜細寓意宜麤且絹之生熟亦不一非貴熟而惡生也工緻宜熟寓意宜生大約不論麤細要以厚重者為尚今之妄論者謂絹不如紙能經久完之紙之壽安能及絹哉夫絹之所以不久者礬重故耳今人不解用礬道理生絹上欲以膠礬糊沒其縷眼不糊沒又不可以作畫故絹地不數年便碎裂無完於是皆絹

之不能經久。彼特不知唐宋名蹟之存於今者。獨非絹乎。古絲今絲。不聞有異。而千餘年尚存。其故何歟。嘗聞前人論云。輕粉入絹素。槌如銀版。古者多用蛤粉。今當以石灰代之。石灰之性。燥而能歷久不變色。以大盆貯水。入灰攪勻。斗水不過合灰。以絹單層入水。拖一過。起水不可絞。則絹終帶絢紋。掛乾。以熨斗貼平。疊方尺許。木槌石底。令有力者槌。勿近四邊。既熟。輪摺。

其未槌之處槌之如前令通體皆熟所謂色如銀版者也然後上幘先拭以膠水候乾再以礬水上之冬月膠清夏月膠重礬之輕重亦隨之故盛暑時不宜用膠礬於絹以其重也生絹膠礬不得不重而易裂熟絹膠礬得以輕而不易裂則絹自應槌之令熟而膠礬自應愈輕愈妙但故輕亦不能用礬如數而膠不足則墨痕水溢如暴紙膠如數而礬不足則墨痕上覆之便

脫膠不足者易以見而量加之礬不足者難以辨。頃點墨於絹以水洗之不脫者可矣。否則亦量加之。此亦候膠礬之法也。要知膠礬是伐絹之斧。特不得已而用耳。蓋絹性與紙異。無膠礬則不利於筆。有膠而無礬則不利於色。能酌而用之。使不過分。其猶愈於今之紙也多矣。夫既為承載筆墨之具。不可不用意如法。以圖永久。詳言之。以質同志。

設色瑣論

五色原於五行。謂之正色。而五行相錯。雜以成者。謂之間色。皆天地自然之文章。於時也。四序之各異於物也。賦性之各殊於人也。榮枯老少。休咎清濁之各。不齊。天地之所生。皆由氣化。而非有意於其間。然作者當以意體之。令無不宛合。一若由氣化所成者。是能以人巧合天工者也。今特條分縷析。詳論其性情製合之法。夫

古人作畫必表裏俱到筆畫已刻入縑素其所設色又歷久如新終古不脫且其古渾之氣若自中出想其作時必非若後人標掠外貌但求一時美觀已也凡畫由尺幅以至尋丈巨障皆有分量尺幅氣色其分量抵丈許者三之一三四尺者半之大幅氣色過淡則遠望無勢而弊於瑣碎小幅氣色過重則晦滯有餘而清晰不足又當分作十分看用重青綠者三四分是墨六

七分是色。淡青綠者。六分墨。三分是色。若淺絳山水。則全以墨為主。而其色則無輕重之足關矣。但用青綠者。雖極重。能勿沒其墨骨為得。設色時。須時時遠望。層層加上。務使重處不嫌濃黑。淡處須要微茫。草木叢雜之致。與煙雲縹緲之觀。相與映發。能令觀者色舞矣。且當知四時朝暮明晦之各不同。須以意體會。務極其致。又畫上之色。原無定相。於今別處。則在前者。宜

重而在後者輕以讓之。斯遠近以明於圖圖處。則在頂者宜重。而在下者輕以殺之。斯高下以顯。山石峻嶒。蒼翠中自存脉絡。樹林蒙密。蒼鬱處不令糢糊。兩相接處。故作分明。獨欲顯時。須教迥別。設色竟懸於高處。望之其輕重明暗間。無一毫遺憾。乃稱合作矣。

春景欲其明媚。凡草坡樹梢。須極鮮妍。而他處尤欲黯淡以顯之。故作春景不可多施嫩綠之

色今之為春景者穠艷滿紙皆混作初夏之景非也點綴之筆但用草綠若艸坡內陽之處當以石綠為底嫩綠為面而巖頭石面則不得用青綠夏景欲其葱翠山頂石巔須綠面加青、面加草綠凡極濃翠處宜層、傳上不可貪省湯堆致有烟辣氣息凡著重色皆須分作數層每層必輕礬拂過然後再上樹上及草地亦然凡嵌青綠者必以草綠拂過一二遍始合盛夏

時神色而不沒其墨。自然鬱勃可觀。秋景欲其
明淨。疎林衰草。白露蒼葭。固是清秋本色。但作
畫者多取江南氣候。八九月間其氣色。乃乍衰
於極盛之後。若遽作草枯木落之狀。乃是北方
氣候矣。故當於向陽坡地。仍須草色芊綿。山石
用青綠。淺不必加以草綠。而於林木間。作紅黃
葉。或脫葉之枝。或以赭墨間其點葉。則蕭颯之
致自呈矣。冬景欲其黯澹。一切景物。惟松柏竹

及林之老葉者可用老綠餘惟淡赭和墨而已
凡寫冬景當先以墨寫成令氣韻已足然後施
以淡色若雪景則以素地為雪有水處用墨和
老綠天空處用墨和花青若工緻重色則可粉
鋪其雪處

墨曰潑墨山色曰潑翠草色曰潑綠潑之為用
最足發畫中氣韻今以一樹一石作人物小景甚
覺平不能以一二處潑色酌而用之便頓有氣象

趙承旨鵲華秋色真蹟正潑色法也。

作畫所用之色皆取經久不退者而不退之色。惟金石為尤。故古人不單用草木之色也。但金石是板色。草木是活色。用金石者必以草木點活之。則草木得以附金石而久。金石得以藉草木而活。而製合之道又在細心體會。須物識其性情而調用之。

花青即靛青。蓋取其浮於面上之彩。謂之花。凡

色皆有質。此獨無之。故不能自存。取者以石灰
為其所附而成。顯是即所謂螺子黛也。其色青
翠靈活。畫家之要色也。先搗碎如沙。用滾湯泡
過。先泡出黃黑水。後泡出青黑水。所出者皆其
翳。雖泡數次。而其本色仍牢附於灰。入乳鉢細
研。後傾膠水攪勻於大盞。候一時許。傾其浮出
之色於別盞。以其底所研者不必加膠。仍如前
細研。復以前浮出之色傾入。候一時許。傾于別

蓋照此法凡數次其底色稍淡乃止蓋花青既是附灰而成者則所出之色愈後愈佳且一二
次不能盡出故必數次取也又其色離灰而附
於膠則灰之極細而不即研者尚留於色如何
得盡耳亦不必太盡本色既全無質若灰太盡
則又嫌於膠重矣湏合將傾出之水搵候半日
許傾入磁盆復去其所研者將磁盆安於護灰
炭火上頓將乾以物細攪勻若聽其自乾而

不細攪則上半多膠下半多灰必攪於將乾之時則不盡之灰與膠之黏性相和矣

藤黃入花青搃謂之汁綠藤黃重者曰嫩綠輕者曰老綠施之固各有所宜搃於重設色上多用嫩綠及嫩綠之極重者曰苦綠設色輕者多用老綠凡用藤黃必視設色之輕重為多寡且以寧少為貴者

古者用蛤粉今製法不傳不如竟用鉛粉但有

鉛氣未淨者變成黑色最大害事。先將鉛粉入膠水研細攪成漿水。候片時傾出面上粉水少頃復以面上清水還入粉再攪如前傾出。凡數次則輕而細者皆出。而重滯之渣滓則去之。將粉并水上冒以帛放大飯鍋上蒸數次。出黃色者佳。蒸至黃色盡乃可用。出青色者是鉛氣最重不可用。即用亦必候有黃色出再候黃色盡乃可用。蒸訖必滿貯清水。冒帛於上安於靜處。將

乾則加水愈久愈妙

硃砂不論塊子大小但要研得極細公而用之
向有說硃砂四兩須人工一日愚則以為必須兩日
不過研愈多則黃膘亦多耳研時須用重膠水
工足後用滾湯入大盞攪勻安半日許傾出黃
膘水炭火上烘乾作人物肉色及調合衣服諸
樣黃色以其鮮明愈於赭石多也出黃膘後
再入清膠水細攪勻安一飯頃傾出復候出餘

黃膘水可作工緻小人物衣服及山水中點用紅
葉之類以其策細也其底所留者尚有大半再
以極清膠水傾入攪勻候盞茶頃傾出作大人
物成片大紅色者用之其底色則仍如前法研
過凡傳成片大紅色當量用硃砂多少入膠水
攪勻先傾出三之一傳於著絹乾用輕礬水拂過
再傾出第二層傳上如第一層法然後將底所
留傳上礬好以臘脂水套過則其色更覺鮮美

矣。

石青有數種。但皮粗而成塊者。皆可入畫。其細不必如硃砂。而漂製之法則同。故不多贅。但研至將細時。必以滾湯泡過攪勻。候一項盡傾去。面上所浮出者。然後再研。若不去。則畫上久必有如油透者。每見舊畫上用青綠處。若油透筆痕外者。皆緣於此。

石綠以沙少而色深翠者為佳。係是青綠山水。

要色。研漂之法與石青同。而加細焉。其底之最粗者。以嵌夾葉。與墨疎苔。及著人物衣服。凡山石。青多者。用石綠嵌苔。綠多者。用石青入石綠嵌苔。若筆意疎宕。則設色亦宜輕。合用青綠。以籠山石。純用淡石綠。以鋪草地坡面。而苔可不必嵌。